

第一七一冊

方輿彙編

職方典

桂林府部

柳州府部

(卷)

三九—四六

四七—四〇

古今圖書集成

中華書局影印



古今圖書集成

中華書局

欽定古今圖書集成方輿彙編職方典

第一千三百九十九卷目錄

桂林府部彙考一

桂林府建置沿革考

桂林府疆域考 有圖 形勝附

桂林府星野考

桂林府山川考一

職方典第一千三百九十九卷

桂林府部彙考一

桂林府建置沿革考

本府

通志

禹貢荊州之域古百粵地本秦郡北疆漢元鼎六年分屬零陵郡隸荊州東漢爲始安侯國三國吳黃武五年割零陵之始安縣陞爲郡隸荊州晉屬黃州宋武帝復爲零陵郡屬湘州尋改爲始建國南齊爲始安郡梁置桂州於蒼梧鬱林之境無定所大定六年始移於今治隋大業初廢州復爲始安郡唐武德中復爲桂州天寶初又復爲始安郡至德間改郡曰建陵乾元初復爲桂州光化間陞靜江節度五代時屬南漢宋仍爲州紹興間陞靜江府元改靜江路明爲桂林府

皇清因之

臨桂縣 附郭

本漢零陵郡始安縣地晉屬始安郡唐析置福

祿縣貞觀初省入更名臨桂宋以慕化縣省入

元明仍舊

皇清因之編戶七十五里

興安縣

本漢始安縣地唐武德中置臨源縣大曆中土將構逆邑人守義不從遂改全義縣晉以縣置

湘州宋初州廢太平興國初改曰興安縣元明仍舊

皇清因之編戶二十四里

靈川縣

本始安縣地唐龍朔初析置靈川縣宋元明俱仍舊

皇清因之編戶四十八里

陽朔縣

本始安縣地隋析置陽朔縣屬桂州因陽朔山爲名唐初析置歸義縣貞觀初省入宋元明俱仍舊

皇清因之編戶三十里

永寧州

本始安縣地唐析置純化縣永貞初改慕化縣乾寧初又析慕化置古田縣屬始安郡宋屬融州後屬靜江府明初復爲古田縣嘉靖末猺獞越城劫藩帑中丞殷正茂討平之奏陞永寧州

皇清因之編戶十里

永福縣

本始安縣地唐初析置永福縣因鄉爲名屬桂州元仍舊明正統間省理定入焉隸桂林府

皇清因之編戶十里

義寧縣

本唐臨川地五代晉時置義寧巡檢後陞爲縣宋開寶中省尋復置元明仍舊

皇清因之編戶十三里

全州

秦屬長沙郡漢爲零陵郡之洮陽零陵二縣地三國屬吳隋改湘源縣隸永州五代晉時改爲清湘縣置全州宋隸荊州路元改置全州路明洪武時改路爲府九年改爲州省清湘縣入焉隸湖廣永州府二十八年改屬桂林府

皇清因之編戶八十四里

灌陽縣

在州南九十里本漢零陵地吳析置灌陽縣因灌水爲名隋省入湘源縣大業末蕭銑復置隸全州唐初省後復置屬永州五代時屬全州宋元明俱仍舊

皇清因之編戶八里

桂林府疆域圖



桂林府疆域考

本府

府志

東至湖廣永州府道州界六百里
西至潯州府平南縣界三百五十里
南至柳州府洛容縣界二百六十里
北至湖廣寶慶府武岡州界二百八十里
自府治至

京師七千四百六十里

臨桂縣 附郭

東至恭城縣界七十里
西至永寧州界八十里
南至陽朔縣界六十里
北至靈川縣界十里

興安縣

在府城北一百三十里

靈川縣

東三十里至桃子隘為臨桂界

西七十里至于羅嶺

南四十五里至界牌為臨桂縣界

北二十五里至小洛江

東南五十里至脚下村

西南八十里至麻陂橋為義寧縣界

東北一百里至海陽山為興安縣界

西北八十里至赤朱嶺為興安縣界

陽朔縣

東至恭城一百里

南至荔浦縣七十里

西至永福縣一百二十里

北至臨桂縣一百四十里

東南界平樂之石脚五十里

西南界荔浦之月山驛四十里

東北界恭城之沙子鋪七十里

西北界臨桂之羊角堡七十里

自古祚驛至府東江驛一百四十里至

京師會同館七千六百里有奇
東西二百二十里南北二百一十里

永寧州

東北至永福縣一百二十里

南至柳州府雒容縣界二百一十七里

西至柳州府融縣界一百里

北至桂林府臨桂縣界七十里

西北至義寧縣一百三十里

自州至

京師七千六百二里

州境延袤五百五十七里東西相距二百七十

里南北相距二百八十七里

永福縣

東至陽朔縣界木馬隘六十里

南至修仁荔浦二縣界黃腰隘二百里

西至永寧州界本縣海灣堡大山界二十里

北至臨桂縣界崩山峽二十里

東南至修仁縣界本縣板塘四頂山三十里

西南至雒容縣界舊街堡一百二十里

西北至永寧州總甫隘十七里

東北至臨桂縣西鄉江北河為界四十里自縣

至

京師七千五百六十二里

東西延八十里南北袤一百里

義寧縣

東至臨桂縣西鄉界一百里

南至臨桂縣兩江界三十里

西至湖廣武岡州界五十里
北至武岡州界一百七十餘里

東南到廣西城八十里

東北到靈川縣治一百二十里

西南到永福縣一百五十里

西北到湖廣通道縣三百里

自縣至

京師七千九百二十里

縣治延袤三百餘里東西相距六十里南北相距二百里

全州

東至湖廣道州安道鋪界五十五里

南至灌陽縣會仙橋小江界六十里

西至本府興安縣光梅鋪界八十里

北至湖廣東安縣淨界鋪飛山界八十里

東南至平樂府賀縣界二百四十里

西南至本府界三百五十里

東北至湖廣永州府零陵縣界一百四十里

西北至湖廣東安縣界九十里

自州至

京師七千五百六十里

東西相距一百五十里南北相距一百二十里

廣袤八百二十五里

灌陽縣

東至湖廣永州府零陵縣粟藁坑界一百八十里

里

西至桂林府興安縣鹽洞界五十里

南至湖廣永明縣三峰嶺界五十里

北至全州清湘深浦洞界五十里

東南到道州一百四十里

西南到平樂府恭城縣一百二十里

東北到永州府零陵縣一百四十里

西北至桂林府興安縣界一百五十里

自縣至

京師七千二百七十二里

東西相距一百里南北相距一百三十里廣袤七百三十五里

形勝附

本府臨桂縣附郭

唐白居易行嚴謨知桂林制東控海嶺右扼蠻

荒

蕭昕送刺史序居五嶺之表控西越之郊

吳武陵記東制邕容交廣之衝南扼賓蠻嚴象

之隘

李義山文水環湘桂山類蓬瀛

桂林志桂嶺摩天灘波經地

宋唐弼記五管之地桂為大被山帶江控制數

千里

李彥弼記桂為西南會府所以為襟蠻帶海用

兵遣將之區

楊萬里全州記衡湘以僻左自遠於中州而亦

以山水重天下

桂林帶江襟山控制蠻荒千里蓋西南一都會

也湘與離互流橫奔逆折勢難飛渡則平樂其

門戶云陸則陽朔為東南冲而金寶頂之村徭

僮最叢永福捍其西南四隘雲聯薄於修荔又

一要害也義寧靈川與安全灌為西北屏藩而

義寧之六隘靈川之七都灌陽之谷源與安全

州之澗時相侵噬蓋彼之勾引為害非一日矣

所幸古田蕩平漸歸撫化間或彝性自起仇殺

然窺伺之心未萌惟是偷人不無潛發而營衛

堡隘之設固不可疎也今計兵之在郡者七千

八百有奇在諸屬者六千八百有奇兵衆餉煩

典藏者能無匱乎嘗考舊所編派於民與民所

以自為計者而未始不深為疆圉慮也夫山多

則地磽民拙則策短偷安而坐食則生不衆而

為不疾是以其郡恆貧重以田不自耕而招佃

於徭僮是藉寇糧也習則招主為徭僮募畫轉

陷吾民是資盜謀也又習則彼不以為我為主而

反乘之視招主若枕上肉是始以為利而終以

為禍也郡貧矣而民又自為尾閭以自匱兵食

其何以資無論桂林凡粵郡皆然易稱積豕之

牙詩管桑土之戶招主罔禁而為豕以礪牙引

寇而內之戶欲民寧處弗可得已

興安縣

通志府縣志俱闕

靈川縣

按縣志靈川東傍九嶷北連衡嶽行數百里至

障山堯嶺為邑東北之鎮望筆峽東橫與香爐

井峙師山象壁則皆重列於左垂蓋榜崖梁冠

金瓶舜山盤嶺則皆重列於右銀江東遶靈水

西環山川並麗土野沃饒古夷獠所不居蓋五

陽朔縣

按縣志陽朔山環列翠水激噴珠三汲浪澎湃於前獨秀峰拱侍於側龍頭天鵝嶂其北天馬壽陽屏其南東通象邑交廣之衝西達湘灘荆楚之道拂雲削玉隱豹潛龍爲桂南之勝觀者也

永寧州

按州志永寧岡巒綿亘青翠插天遠廓溪流澄瑩鏡地北則寶蓋山圓淨突兀安峙如屏南則筆架山三台筍布拱映前案東有文峰崔嵬秀拔縹緲入雲西有念崖靜正端重壁立萬仞黃源巨浸百折而迤透於東城白馬清泉由西而迴抱於北廓而又銀屏山翠眉峯高聳東北爲捍蔽而又有三門隘都復嶺前後重複關鎖爲之藩籬諸如鳳凰天柱虎踞壽巖奇峰天馬繡谷紆迴周匝宛若天排其從入之路皆羊腸鳥道至州始闊坦地寬鉅蓋天造地設隱然一金城湯池也其形勝如此

永福縣

按縣志永福爲省會之要路據宜邑之上游與義寧爲唇齒當古田之門戶古田永寧之舊縣也

義寧縣

按縣志義寧四面皆山西北嶺巒高聳森羅起伏之狀若鳳翔若虎抱若翠屏若疊壁環向回互聯互不絕且有義江石濠山末塔背諸水繞帶邑城清漣洞澈亦天造金湯也特徭僮居鄰

邊隘七都蠻賊出沒無歲無之要必有形勝之主也

全州

按州志境控湖湘之上游當桂林之要衝南則三江爲帶三華爲屏北負柳湘黃華乃其左襟興靈爲之右戶東南諸峯秀麗奇偉湘瀧二水合流其下江山猿鳥之姿雲泉竹樹之美爲江南諸郡甲

灌陽縣

按縣志縣際湘源而瞰嶺右控平樂而距零陵瀧水西繞而帶縈三峯對峙而鼎立濂溪周子波瀾所及之地山峭削如簪水縈紆似帶羣峯森列參錯秀整洪濤沃日澄瀾際天風水與潭之相鄉往往相類環瀧皆山山高幾千萬疊水遙幾千萬里水抱山根石壁千仞江流澄涯有石穹然山水清奇甲於旁邑多山幹異派分層見疊出

桂林府星野考

府志

府總

廣西爲楚粵裔土故分野有荆揚之殊攷諸往牒其說蓋紛如也惟宋蔡戡之論東界北接吳者屬揚爲星紀牛女之分西界北抵楚者屬荆爲鶉尾翼軫之分紛紛之說當自此而定矣

桂林府山川考一

府志

本府

臨桂縣附郭

桂山 在府治東北郭三峯連屬城中望之前峯拔起是多桂焉次峯宛轉一名北山後峯龍從有巖曰疊綵舊號越王山上有石壇五代時馬殷所築今有馬王臺三字

獨秀山 孤標直聳約五百餘丈周回一里頂平如蒼玉正面端嚴秀整側視如卓筆校諸峯獨雄故名山上有巖巖下有洞前宋始安太守顏延之讀書其中名讀書巖後爲報恩寺至順壬申順帝以太子謫靜江寓寺居焉山今在靖江王府中唐張固詩孤峯不與衆山儔直入青雲勢未休會得乾坤融結意擎天一柱在南州按通志大曆中李昌夔建學其下元祐間孫覽重修讀書巖榜曰五詠堂於其上

伏波山 在府治東北又名巖突起千尺有懸石如柱去地一線不合俗云馬伏波試劍石又云石柱連出狀元柱在洞中洞舊名玩珠宋張維易曰還珠張孝祥大書於石元張湖山歌桂林有山名伏波蒼崖翠壁高嵯峨山根陰峒透

水府神奸物怪交搗訶我來登山復尋峒直涉風浪攀藤蘿無誰可問得名姓賴有殘碣堪摩挲爲言新息昔事漢老矣矍鑠猶操戈提師振旅蹴蠻國下潦上霧寧憂那仍聞薏苡能禦瘴採之返載數駱駝一朝明珠肆譏口倒囊投棄茲山阿有云昔有捕魚者龍宮竊入張網羅適遭老髯耽晝寢攫取明月懷青囊自知至寶世

稀有惟守可遺那歸他守稱賢侯不敢受亟命返壁無蹉跎洞名還珠此二說無乃好事相傳訛柳州使君老好古扁舟况此曾經過重來邂逅請停楫君看此事當如何使君無言若有得仰面長嘆春風和肯將往事擾胃臆爲我呼酒傾金荷明朝酒醒湘水上引帆南去飛如梭按洞壑志懸石前臨江濱波浪洶湧日夜激齧之按明一統志與獨秀山相望下有洞可容二十塌石如蒼玉石脚插入灘江按通志西一面界在城中東北有蒙亭遺址

七星山 在府城東二里舊名七星巖七峯列如北斗旁有小峯如輔星緣磴而上山半有亭曰簪帶絕頂有道院張孝祥詩朝遊七星巖暮上千山觀東西兩奇絕勢略嶺海半解縉詩早飯行春桂水東野花榕葉露重重七星巖窟簪燈入百轉縈迴徑路通石溜滴餘成物象古潭深處有蛟龍却歸爲恐衣沾濕洞口雲深日正中陳璉詩六丁何年開翠岑穹窿石室高千尋煙生丹竈火常在花落碧桃春又深倚巖懷古成浩嘆掃壁題詩還獨吟日華月華去已遠玉笛誰能傳妙音按通志巖洞虛竅紆迴數里遊者忘倦

於越山 在疊綵巖前上有唐人臺榭遺基刻於越山三大字於崖旁下有巖深窈窕窮巖門刻曰栖真世傳獼猴巖卽是也

華景山 在府城中西北下有洞深廣如厦屋山頂有諸葛武侯祠中多唐人遺刻有隙旁通

別穴自洞後捫蘿而上有遺基巋然父老傳馬竇嘗建亭於山之東南有老榕生半崖間虬枝密葉如垂翠幄石壇可坐數十客詩翁蔣卓所居今廢宋李師中詩詩翁仙去舊壇荒雲滿空山花自香老盡遊人春不問杜鵑聲裏幾斜陽寶積山 與華景相連多詭石惟木氣象陰森唐都督王駿祠在下今廢東隅有巖乳石融結瑰奇萬狀元梁遺詩松涵雲影竹生烟松竹深藏小洞天讀罷黃庭觀鶴舞更於何處覓神仙按明一統志在府城北三里舊名呂公巖

彈丸山 在府城東二里隔灘江山下有巖出乳石圓如彈丸鄺道元水經云彈丸山有泉奔流衝激注於灘江卽此

西山 在府城西三里一峯峻拔如立魚狀俗號石魚峯唐戎昱詩登高西山上高處更堪愁野菊他鄉酒蘆花滿眼秋風烟連象郡兄弟客荊州早晚朝天去親隨定遠侯宋張栻謝劉芮夢遊西峯詩故人疇昔隱西峯野寺幽房一徑通無復老僧談舊事空餘修竹滿清風夢中尋勝忘南北句裏論心豈異同我欲壁間題唱和他年畱得咤南公按洞壑志立魚峯在西山後雄偉高峻如植立一魚餘峯甚多皆蒼石刻峭按通志西山在隱山西有觀音中峯西峯大悲寺院內有古像乃盧舍那報身之所又有西慶林寺今俱廢

堯山 在府城東北一十五里高廣磅礴延袤數百步環柱之山皆石此獨積土中有堯帝廟

桂林風土記云天將陰雨雲氣四起未經路張栻有謁廟詞刻於石今靖江府諸王墓在其下按通志有碧桃仙館館前平田曰天子田其最高處曰白鹿

虞山 在府城北五里又名舜山層聳臨江前有虞帝廟旁有渡曰皇澤灣唐建中磨崖刻記具存宋淳熙初張栻重建刻記於崖下開韶音洞上建南薰亭

隱山 在府城西三里寧宇記云唐李渤出鎮

見石門大開有水泓澈乃芟薙蕪穢疏通巖穴石林磴道若天造靈府不可窮究因號隱山上有六洞曰朝陽夕陽南華北牖嘉蓮白雀今皆荒穢遺址尚存按洞壑志六洞皆在西湖中隱山之上曰朝陽二曰夕陽三曰南華四曰北牖五曰嘉蓮六曰白雀泛湖泊舟自西北登山先至南華出洞而西至夕陽洞窮有石門可出至北牖出洞十許步至朝陽又西至北牖穴口隘狹側身入有穴通嘉蓮西湖之外既有四山巉巖碧玉千峯倒影水面固已奇絕而湖心又浸陰山諸洞之外別有奇峯繪畫所不及荷花時有泛舟故事勝賞甲於東南

南溪山 在府城南七里白龍峒下聳拔千尺烟翠凌空下臨南溪李渤詩長嘆春泉去不回我今去此幾重來欲知別後畱神處手種巖花次第開如雲不厭蒼梧遠似鴈逢春又北歸惟有隱山溪上月年年相望兩依依

雉山 在府城南三里又名灘山又名枕水高

三百餘尺周迴二里按郡國志云上可容五百家有洞深百餘步路窄不可窮多白蝙蝠宋末初間有僧栖顯居之日誦法華經有雉終日來聽一夕化去托生民間有來告者栖顯訪之果然因以名臨江舊有青羅亭張南軒重建禪亭今廢宋鄒浩詩客睡當年記雉山杜鵑聲切枕難安今朝歸上山頭過不見杜鵑空夢殘黃照詩爲愛空門息世機儒衣不著著僧衣淵魚林鳥已聞法更待當年瑞雉歸章峴詩晴溪幾曲轉澄灣朝憩龍巖晚雉山林叟野人休笑我平生所得是官閒按明一統志雉山在府城東南三里灘水之陽其山孤拔下有澄潭旁有洞穴南北直透上有怪石敝危藤蘿縈茂土人嘗避亂其中

穿山 在府城東五里山巔有穴通透望之如輪月掛空焉

辰山 在府城東北一十里山有三巖按舊郡志有云下巖初入昏黑行十餘步乃明豁右石室穹然坐三十餘客巖屏西向下瞰平野山川城郭瞭然在目自巖屏左登涉磴百餘級至中巖乳石奇怪可駭可愕又由閣道至上巖巖之巔有小亭放目天際冥濛杳靄不可窮極嘉泰初士人劉時升始出此巖於荒莽中游者驚詫以爲桂林諸山之冠經略李大異謂久晦弗彰疑爲神物所居名曰蟄龍巖

中隱山 在府城西一十里又名中隱巖俗名佛子巖山有三巖下巖深廣如橫艘入門行十

許步有石乳狀如人獸轉曲道稍窄若不可進中巖明爽高尺許通出背巖門垂石乳如羽蓋幢幡飛仙騰虬狀令人玩之不忍去上巖差小有寺今廢元郭思誠詩訪隱尋幽緩著鞭梅花初試小春天孤峰上下分三洞一水縈紆溉萬田按洞壑志一名鍾隱巖去城十里號最遠一山岑起莽蒼中山腰有上中下三洞最廣中洞明敞高百丈許上洞差窄一小寺就洞中結架因石屋爲堂室按通志其間勝致不可窮極

侯山 在府城西十里高聳如公侯端冕之狀故名上有金鉤巖巖在山絕頂攀援曲折而上俯視諸峯如培塿然

普安山 在府城南三十里山勢蜿蜒回遠有泉湧於山頂寺名龍泉宋張孝祥請封每歲春秋桂林府官親祀著令典按明一統志其泉四時不涸禱雨輒應明封爲龍泉春秋祀之

駁鹿山 在府城東五十里舊名陽龍山高六十丈廣四十里頂有二池按舊圖經云唐開元間僧元康以論經應詔元宗賜以異國所貢白鹿騎歸此山今僧堂前有池水色紺碧間有蓮開五色交煥初非人種謂之飛來蓮後漢地理志始安郡東有駁樂山遼山後人以駁樂爲鹿按明一統志又號福祿山

光明山 在府城西十里山勢峭拔有一穴通明世傳馬賓因出獵犬逐兔入穴中尾其後見有水可疏遂決之爲子家莊渠灌田數百頃

琴潭山 在府城西六里羣山中有一小山巨

石林立如鋸解刀削其下空洞淵然成潭小流琮琤如琴聲因名其水溉田千畝前有小巖明潔虛廣中有石榻石琴旁有荔枝巖石門不甚高中則曠然深百餘尺多滴乳狀如荔枝

象鼻山 在訾家洲之西突起水濱形狀類象故名下有水月洞孔鑄詩象鼻分明飲玉河西風一吸水應多青山自是多奇骨白日相看不厭多

關鷄山 在雉山之東西山在江左右岸孔鑄詩巧石如鷄欲關時昂冠相距水東西紅羅纏頸何曾見老殺青山不敢啼

巾子山 在府城西十里有巨石冠其巔如巾冠狀

駟馬山 在巾子山前四山攢立如馬驤首長

鳴俗呼大馬山

七寶山 在府城南十餘里又名七寶巖下有塘水

大塘山 在府城南十里端厚如覆釜山有滑石江遶其前

寶華山 在府城北三里下廣上銳高矗雲漢寶髻山 在府城西勢高聳山巔有石如高髻

舊志易名獅子山其狀不類

鎮南峰 在府城北朝京門旁有石崖唐大曆中刻平蠻頌宋狄青平儂智高勒碑於左

桂嶺 在府城北三里經略呂源大書刻石因此呼之

烏嶺 在府城東二十里按舊圖志隋有僧攜

佛經舍止羣鳥隨飛因得此名嶺極峻高數丈後有僧道銓開鑿砌石磴數千級疏山泉注於路隅以便行者嶺巔有小寺

五嶺 李白云桂水分五嶺衡山朝九疑此蓋不同秦之所謂五嶺者

游岡嶺 在府城東二十里舊名牛岡俗訛呼游

鋼岡嶺 在府城東四十里高數百丈綿亙數十里

百丈嶺 在府城東五十里高險難登

半雲嶺 在府城西北二十里極高峻

望城嶺 在府城東五里往來企望城郭故名

讀書巖 在獨秀山下有石榻石牖前宋太守顏延之讀書之所後人因以其五君詠刻於石

按洞壑志直立郡治後爲桂主山傍無坡阜突起千丈峰趾石屋有便房石榻石牖如環堵之室顏延年守郡時讀書其中

屏風巖 又名程公巖在府城東北五里斷山屹立高百餘丈中有平地可容百人鍾乳倒垂

如瓔珞有石穴通明逗穴而出山川城郭恍然如在壺中范成大建壺天觀巖曰空明刻銘於石觀後廢弘治間重建壺天寺張孝祥詩高巖

畫天開仄徑通乳穴隈堆青螺髻堞嶠白玉闕外有虎豹蹲中恐蛟蜃蟄東縈俯雷電西出挾

日月萬壑來悲風六月不知熱但覺駭心目未易記筆舌平生山水趣嶺海最奇絕洞府二十四未厭展齒折晚乃遊此巖餘地比僕妾同來

六七士嗜好頗相埒舉酒酬山神慰汝久湮滅

按洞壑志在平地斷山峭壁之下入洞門上下左右皆高廣百餘丈中有平地可宴百客仰視

鍾乳森然倒垂者甚多躡石磴五十級有石穴通明透穴而出則山川城郭恍然無際余因其處作朝天觀而命其洞曰空明

湘水巖 在府城東三十里俗號聖水巖夜半則湖上巖日中則潮下巖每日如常略不愆期

山腹地廣數十畝羣峯環擁或傳三五十年有大潮有異人出

疊綵巖 在府城北三里大山壁立屏開山巖層層包轉至巖後有亭翼然名越亭今廢重建

拱辰望江二亭北望瀕江諸山縈環如畫按通志考圖經云以石門橫布若疊綵然故名山多

桂樹巖後有越亭拱辰望江三亭俱廢有風洞在綵山後陰風襲人洞西北隅有小竇透出山

背爲北牖洞洞左小山曰於越按洞壑志在八桂堂後支徑登山大半有洞曲轉穿出山背

曾公巖 在七星巖下舊名冷水巖山根石門哈呀中有澗水東流伏於石下源委不可知宋

元豐中曾布帥桂跨澗爲石橋榜今名橋下水聲泠泠寒氣侵人橋側有石乳雙懸如垂蓮頰

雲危欲下壓度橋有石四鱗差其中水無乾溢過田縈紆數十步路窄不可通賴視有石罅尺

許匍匐而進復高曠可通棲霞自左隅數十步出至洞洞名元風洞旁水清淺高岸玉立如削

眞勝槩也宋劉誼詩尋得新巖冠一州使君從

此作鰲頭千年草莽埋幽致今日衣冠成勝遊

洞穴已能驚俗眼神仙須合隱浮丘主人將爲商霖起還許微官卜築不孫覲詩羣峰倚天立

萬馬屹不動風鳴紫玉珂雨暗青絲鞵相君千里目渺渺孤鴻送披雲觀天功鑿翠出巖洞中

空貫長虹側立剖天甕宛宛臥石梁欲起特地控王植已上天甘棠有餘誦獨余澗底泉時與

幽人共按洞壑志有澗水莫知所從來自洞中右旋東流橋下復自右入莫知所往或謂汨流

入於江也度橋有仙田數畝過田路窄且濕

劉仙巖 在府城南七里今名昇仙石相傳仙人劉仲遠居此磴道攀援而上石室高寒旁有

穿雲仙跡宋曹輔詩石磴仙巖路登臨莫倦攀亂泉歸萬壑一目盡千山嶂雨收雲去松風吹

夢還道人今不見無處覓元關雅琥詩削雲千丈倚蒼崖箭括通天一竅開草樹陰森藏洞府

烟霞縹緲護樓臺白雲已向空中去黃鶴時聞月下來欲問仙翁借筇竹凌高長嘯望蓬萊

龍隱巖 在府城東二里瀕江水之分流遠其下其後連屬七星山巖後有洞名龍隱其下水

深莫測仰視其上有龍跡天矯長竟數丈鱗鬣宛然龍疑蛻去跡印泥上久化爲石也巖內寬

廣可容百人巖巔石色蒼翠可愛巖左緣磴而上舊有驂鸞亭後改怡雲今改望江氣象高廣

後洞水勢湧激盛暑汎舟如在三峽中巖口舊有佛閣今廢李師中詩春波飽微綠斗柄涵虛明方舟貫巖腹鵝鵲相酬鳴仰窺穹窿頂宛轉

百怪呈僅餘鱗甲碎不見頭角獐下瞰清冷淵
演迤萬頃澄但同魚鳥參忽遣蛟龍驚扶苔撫
奇篆倚棹看題名三將標殊勛自與山不傾誰
歎贅小築跋恐山靈嘆南洞更幽絕仙佛依崢
嶸太虛可爲室豈復資梁楹乳泉助茗椀中有
冰雪清何須驂鸞去此卽白玉京鼎來不遠客
抱琴忽逢迎愛此無絃曲崖魚同一聲爲君洗
塵耳喚我詩魂醒祇恐白衣至好句無由成韓
雍歌桂山何奇哉峯巒起平地星羅數百里像
物非一類列桂擎高空門屏嶂天翠尖分筆鉅
巧稜削劍峯利海螺爭獻新玉笋併呈瑞重巖
垂萬象深洞容百騎洞變梁猶存關徒門未闕
石罅瀉寒泉清響更幽致想當開闢時清濁各
奠位精華妙凝結磅礴隱深粹洪水滔天流壅
土日漸墜歸然不可動參雜如布置走筆題新
詩磨崖刻深字匪追浯溪班聊補桂林志閱珪
詩此地何年隕七星奏鞭不到靖江汀潭湫龍
隱猶遺跡峯頂鸞驂尚有亭一洞松雲春靄靄
半巖花雨晝冥冥題詩不用紗籠護掃破莓苔
幾點青婁良詩江澄風靜雨初晞畫楫凌空入
翠微古洞雲閑龍去久疎林葉脫鳥來稀苔痕
滿徑迷仙跡嵐氣生寒透客衣光景無邊收不
盡落霞孤鶩又齊飛按洞壑志龍隱山龍隱巖
皆在七星山脚沒江水中泛舟至石壁下有太
洞門高可百丈鼓櫂而入仰觀洞頂有龍跡天
矯若印泥然其長竟洞舟行僅一箭許別有洞
門可出巖在洞側山半有小寺卽巖爲佛堂不

復屋雉巖亦江濱獨山有小洞洞門下臨灘江
靈秀巖 在府城西十里有大石室三面虛明
穿透左右隙道數十可通行兩旁皆類臨曠野
玉乳巖 在府城西十里極深遂秉燭乃可遊
石室穹然中皆石乳瑩如冰玉
戴秀巖 在府城西五里山坡崎峻中多石乳
遊者罕至相傳郡人戴秀遇異人隱於此
明月巖 在府城北五里一山角立其巖南向
緣磴而上空明瑩潔舊有道人居之今無又名
明月洞
月牙巖 在龍隱巖北捫蘿而上石磴數十級
半山之中形如初月故名
四字巖 在府西門清塘後
雪洞 在獨秀山西石壁垂乳潔白如雪唐人
有詩刻今滅惟雪洞二字尚存旁有二石如鳳
時號雙鳳石
元風洞 在七星山下慶林觀後洞口低下陰
風襲人盛暑凜如冰雪舊名風洞省志改今名
宋張孝祥詩山入烏蠻連越嶠天開斗野對珠
宮應憐桂海長炎熱乞與清涼萬竅風按洞壑
志去棲霞傍數百步風自洞中出寒如冰雪
南潛洞 在西湖中羅家山上自南竇持炬入
數步乳石中峙乳穗纍然地有跡如龍爪所劃
俗名龍田
北潛洞 在隱山之北中有石室石臺又有石
果作荔枝棗栗之狀按洞壑志人採取玩之或
以飢盤相問遺

棲霞洞 在七星山畔緣磴而上入石門下百
步始坦夷可坐數十人高爽明豁盛夏無炎歎
隆冬溫然石乳凝結殊形怪狀不可勝紀其下
復有洞入半里遇大壑不可進更有路北行頗
僂而前數步復寬衍兩旁十餘丈石乳下垂如
玉簪珠梳曲折躋攀始可進所見益奇又行食
頃寒泉恆石交映疊出遊者錯近世傳穴通九
疑山洞中有老君像舊傳唐明皇所寘宋建炎
間經略李彌大更曰仙李洞洞口有亭曰齊雲
久廢淳熙初范成大重建易名碧虛今廢劉牧
詩諫紙空箱後高牙拂斷霓還符翠州夢來見
石門題架竹生新逕誅茆得舊蹊陰崖走別洞
陽嶺帶回溪吟桂人非隱逢花客自迷虛中畱
納受絕壁阻攀躋地遠饒征戍君來息鼓鼙吏
閑眠鹿鹿民樂戲鳬鷖勝事時相遇芳樽手屢
攜清風與詩句畱與昔賢齊詹士龍詩八桂棲
霞洞穹然自渾成豐隆昭良靜空洞合離明壁
隱龍涎滑脂凝鰓尾清仙靈杳何許登眺暢幽
情張雄飛詩仙李巖前問大還碧沙瑤草水潺
潺虎隨客去春尋藥龍作人來夜叩關八月桂
華連五嶺七星雲竇接三山洞天說有飛昇處
只隔雲烟縹緲間思立詩洞府仙書祕紫泥蒼
苔露冷鶴蹤迷黃金矸磔丹畱鼎白玉稜層石
抱梯葉縣鳬來飛赤鳥葛陂龍去化青藜瀟然
已與人間別却訝花間有鳥啼觀音奴詩拄杖
訪棲霞神仙信有家聽泉消俗慮拂石看雲花
海內年將暮山中日未斜何堪驄馬去回首一

雲遮明陳輝詩元巖何太古洞穴更虛明宇宙
初開闢山峯已孕精縈紆隨地轉磅礴自天成
此日同登眺吟餘思倍清孔鑄詩洞門棲彩霞
晚晴朝作雨我欲飽殮之長生人有幾無名氏
詩天斲神剗不記年洞中風景異塵寰江波蕩
漾青蘿帶巖乳虛明碧玉環地接三山真境在
天連合浦寶珠還重來恍似乘槎到慚愧靈門
夜不關按洞壑志在七星山七星山者七峯位
置如北斗又一小峯在傍曰輔星石洞在山半
腹入石門下行百餘級得平地可坐數十人傍
有兩路其一西行兩壁石液凝江玉雪晶瑩頂
高數十丈路闊亦三四丈如行通衢中頓足曳
杖鏗然有聲如鐘鼓聲蓋洞之下又有洞焉半
里遇大壑不可進一路北行俯僂而入數步則
寬廣兩傍十許丈鍾乳垂下纍纍凡乳牀必因
石脉而出不自頑石出也進里餘所見益奇又
行食頃則多岐遊者恐迷途不敢進云通九疑
山也

風洞 在疊綵山後石門砦研陰風襲人盛夏
無暑故名明李楨詩桂林繞郡皆奇勝偉觀登
臨此更多五管靈山連粵嶠百蠻溪水匯牂牁
朝廷愧乏捐骸報歲月真成浪漫過只把新詩
當遺愛他年畱與野人歌楊茂元詩登登石磴
不辭勞爲愛雲林隔市囂上下洞連風貫穿高
低山擁水週遭青天放眼樓臺迴斗酒開懷主
客豪細雨催歸情未竟臨分猶共說離騷劉節
詩絕壁盤雲開古洞重樓疊綵倚蕪城旌旄日

午花薰氣林樹風過鳥出聲天畔草庭千里目
沙旁烟艇十年情粵南消息黃華杳憔悴揚雄
戀玉京

水月洞 在宜山之北其洞門踞江圓如滿月
一統志云濱江三洞惟水月最佳是也宋張孝
祥改曰朝陽巖構亭其上亦曰朝陽亭按明一
統志在府城南二里洞門透徹山頂高數十丈
其形正圓望之映空月皎儼如月輪

張公洞 在佛子巖下

虛秀洞 去城差遠石室面野左右皆有徑隧
各數百步穿透兩傍亦臨平野

白龍洞 在府南七里俯瞰南溪石室穹窿高
爽中有佛宇唐李渤命曰元巖後避南漢劉巖
諱易曰白龍洞宋朱希顏詩小溪漱碧響潺潺
路入龍宮杳靄間佳節漫添新白髮古人賴有
舊青山花朝幾共湘南醉萍跡何年嶺北還歸
路聯鑣紅日晚多慚龍臥白雲間按洞壑志在
南溪平地半山中龕有大石室由屋右壁入洞
行半途有小石室按明一統志洞中乳石凝結
如白龍狀

朝陽洞 在府城西乃隱山六洞之一以後五
洞俱同宋孫抗詩險絕信天開春蘿蔭古苔不
愁雲影閉先得日光來片石充棋局涼坡遞酒
杯東風偏著意草木爛成堆宋朱希顏詩湖上
初驚八月秋嶺頭人見桂香浮巾車幾憶陶彭
澤竹馬多慚郭細侯未遣林泉還舊隱且同丘
壑訪真遊一枰勝負人何在試問樵柯已爛不

呂愿中詩半世觀山鬢已皤欲求釣艇老漁蓑
杖藜又過烟霞洞聞說當年爛斧柯
夕陽洞 孫抗詩塵寰雖未遠灝氣覺偏滋日
落鳥歸處秋高風勁時吟餘下天籟坐久涼冰
肌信是栖幽境銀蟾照履綦呂愿中詩怪底浮
屠不宿桑直搜巖實意徜徉洞中日月未嘗老
何處仙家有夕陽

南華洞 孫抗詩峭徑入蒼烟他山盡一拳上
盤朱鳥翼中寓漆園仙清可攜壺賞涼堪拂石
眠九疑生接境曾此按薰絃呂愿中詩乳崖深
峭水淙幽六月來遊儼似秋安得蓮蓬一覺夢
倚巖栩栩反莊周

北牖洞 孫抗詩舊駐東方騎因題北牖名來
須風作御去認斗爲城日氣晚方到雲收寒易
生予心匪游行拱北振華纓呂愿中詩南牕聊
寄傲北牖有涼風巖洞幽深處結茆容老翁
嘉蓮洞 孫抗詩地應連海眼終古蓄寒泉四
列青蒼壁雙開菡萏蓮已嗟真賞去猶訝昔香
傳未媿東林下霜葩如衆賢呂愿中詩羃羃烟
霞鎖洞關旁開六戶類連環芙蓉未是仙家瑞
更約同登太華山

白雀洞 呂愿中詩洞中石燕可長生白雀何
因浪得名無限好山難買得世間奚用孔方兄
乳峒 在龍隱巖後元王思勣詩乳穴佳名久
欣慕茲遊直與心期副今朝葉散七枝筇衰遲
未覺攀躋苦湘南懸望碧雲橫桂嶺遙瞻煙靄
暮招提鐘磬出幽深村野牛羊自來去忽聞流

水響潺潺漸觀巖局隔烟霧山溪踏履亂崎嶇
翠壁題名雜新故乍睽朱墨略官箴稍覺追隨
遽幽趣絕知官裏少夷途始信閑中無窘步人
生如此信可樂誰向康莊塞歸路苦醉生前有
限杯澆我胃中無盡意早知富貴如浮雲三嘆
歸田不能賦

木龍洞 在府城東北郭

韶音洞 在虞山後石竇初入甚窄中則虛明
達於皇澤灣洞門高廣頗灣之上水石相激爽
氣襲人宋方信孺古相思曲西風鳴桂樹落日
掛楓林遊子懷歸期余悲渺登臨虞山一何高
湘水一何深英皇僅枯塚寂寞南薰琴我欲奏
古曲俗耳更哇淫古器不可見聊作相思吟相
思長相思相思無古今一歌衆鳥聽再歌萬籟
暗推手君勿歌有酒且孤斟落落此時意寥寥
千載心吾酌毋庸絕四海誰知音

華景洞 在華山下又名華景巖前有塘洞中
空明軒豁可容數榻呂愿中詩斯洞名華景累
累乳石懸虛崖疑月窟絕頂瞰江湍巖底金山
寺峯頭玉井蓮地形居衆外氣象偉無前倚杖
觀初月歸輿觸暝烟滿林排翠幄封徑簇花鈿
爽致資清賞鐫題記昔年猿啼聲應谷雲破月
侵筵策蹇追華駟鳴鵲指墮鳶誰人能畫此爲
倩老龍眠按洞壑志高廣如十間屋洞門亦然
還珠洞 在伏波山下俯瞰灘水中可容二十
榻戶牖穿透石如蒼玉旁垂一石柱下至平地
不合者纔一線許俗號伏波試劍石洞中石上

有巨人跡紋理如刻復有紫白二蛟長數丈蜿
蜒相向有圓暈直其首如二龍戲珠狀舊傳漁
父得珠事故名或曰漢馬伏波征交趾回載薏
苡經此因名

淨瓶山 府志無按通志在城南十餘里有
小洲如印腰有梳粧亭北有眞妃廟後有洞門
石如華蓋垂下似荷葉又名蓮葉洞

白鹿山 府志無按通志在城南四十里世傳
元康禪師騎鹿隱此

臥石山 府志無按明一統志在府城南五十
里

灘江 源出海陽山北流爲湘水東南流爲灘
水至廣信入鬱江行九百八十里又名桂江今
海陽山所出之源在靈川縣流入興安復經靈
川會衆水以至桂林繞府城之東北復南流闊
六十丈漢歸義越侯出零陵下灘水是也
陽江 源出靈川之惟羅嶺經分界山馬公嶺
環繞五十餘里沿城之南流至雉山合灘江按
明一統志在府城南源出靈川縣思磨山東流
入於灘江

彈圓江 寰宇記所引水經云彈圓山有湧泉
奔流迅激東注於灘水山龕及溪中有石如彈
圓因以名在城北十里闊十丈源出堯山西南
流經彈圓山下

相思江 唐地理志臨桂縣有相思埭長壽九
年築以分水使東西流在府南五十里源出臥
石山下闊十丈東流合於灘江西流合白石水

靈建江 自堯山羣水堯廟下發源經彈子巖
下與小東江合入灘江

浪石江 在臨桂縣南鄉歷涼風合南渠水入
相思江至灘江

遶江 在臨桂縣西鄉古安里發源至安田西
入銅鼓墟與永福江合

癸水 在府城東十里古記云癸水向東城永
不見刀兵宋德祐二年春水忽轉流城南人以
爲異是年冬果受兵

驛水 在府城西二十里闊五丈東南流入灘
江

白石水 在府城西六十里闊二十丈發源於
義寧丁嶺下會衆水南流至永福東流合灘江

黃源水 在府城西二百二十里源出永寧州
湧石山下經臨桂縣界合白石水

丁秉水 在府城東三十九里源出羣山下南
流合灘江

西湖 在府城西三里西山之下近隱山六洞
闊七百餘畝在唐名其源爲蒙泉流爲湘清湖
久廢宋乾道間經略張維築斗門復舊觀淳熙
間經略張栻以爲放生池元季爲田疇矣

白竹湖 在府城西南三十里官道之西闊百
餘畝冬夏不涸

南溪 在白龍洞前東流入灘江

蒙溪 在隱山下
馬溪 在府城東四十里闊一丈源出羣山東
流合灘江

臨溪 在府城東南五十里闊十丈源出羣山下南流合灘江

龍潭 在宜山之下水月洞西

金龜潭 在府城西隱山下

青楓潭 在府城南一里灘水之最深者

曲斗潭 在白龍洞西迴旋數曲東合南溪

雉山潭 在雉山之下

訾家洲 在府城東南先是訾家所居因以名

之雖大水不能浸自古以爲浮洲唐元和中裴

行立建亭軒館閣今廢唐歐陽賓詩舊業分明

桂水頭人歸業盡水東流春風日暮江頭立不

見漁人有釣舟張孝祥詩一雨便清涼風回百

草香雲山米家畫水竹輞川莊僧賦鷓鴣新帖牆

榛軒舊行歸羈乘晚霧空翠滿輕裝

北亭洲 在府城北舊有遊江廟

義井 一在府城南大街壩頭巷下一在南門

下軍需庫前水皆甘冽

科甲泉 在府學西隅膳堂前按通志明洪武

初布政胡拱辰開次年對策兄弟同登進士

獨秀泉 在獨秀山下

冷水泉 在府城東鄉

龍泉 在府城西

古渠

春濤池 在宣成書院內

寶賢池 在桂林書院內

聖母池 在府西東嶽行宮之內

明月池 在府北

流杯池 在府東路旁有泉出山麓

洗硯池 在府北

洗馬池 在府城北隅水車巷街北

龍池 在府城西鄉民禱雨屢應經略張維重

浚甃以石

揭帝塘 在府北少東八桂堂之下獨秀峯伏

波巖對峙其側張孝祥詩山月半池白東風終

夜涼蛙聲作鼓吹荷芰製衣裳

湖塘 在府城東十五里上下兩塘相通闊數

百餘畝深十餘丈灌溉甚廣

龍塘 相通湖塘

欽定古今圖書集成方輿彙編職方典

第一千四百卷目錄

桂林府部彙考二

桂林府山川考二 水利附

職方典第一千四百卷

桂林府部彙考二

桂林府山川考二

府志

興安縣

海陽山 在興安縣南九十里靈川界上湘灘二水所自出也舊志云海陽山水起零陵蓋其地在漢屬零陵郡按明一統志山下有巖幽深行數百丈至水泉處闊不盈尺其深叵測
龍蟠山 在縣東一十五里山下有洞洞門數重遊者秉燭而入又水產鮑魚四足而有角爾雅云鮑似鮎四足聲如小兒今商州溪中亦有此魚按明一統志其魚人不敢傷恐致風雨
鳳鳴山 在縣北三十七里宋淳熙間邑人蔣耒叟登甲科縣令羅震以耒叟所居近此山故名按明一統志俗呼鷄爬山
點燈山 在縣西三里有巖昔有陶處士讀書於此山夜有燈光因名
龍山 在縣南四十里民居環繞唐質肅公家

先墳在焉

全義山 在縣東三里秦史祿通渠開此嶺

東嶺 在縣東地名錦水有二峯如卓筆

始安嶺 在縣前百餘步民多居其上

越城嶺 在縣北三里即五嶺之最西也

草聖巖 在縣西十五里月山之西前有山寺

唐僧雲嶠習草書有雲嶠書堂并滌硯池

鹽砂巖 在縣西六里有砂與鹽相似入湯復化鬻鹽者多取以雜之

寶峯巖 在縣西北二十里

石門巖 在縣西北二十里有石如幕扣之有聲

呂巖 在縣東北二十五里石成呂字故名

龍鳳巖 在縣東梓林洞其中石乳凝結如龍鳳狀泉出巖中灌田甚廣

乳洞 在縣西南十里有上中下三洞其中虛明夏涼冬溫內有龍田如鑿稜層紆曲水溢不涸洞之澳有清泉噴出沿石壁左流成溪竊然深黑觸石湍激有聲洞門左旋而上十步餘至中洞地勢爽塏內有田數畦左有三石如柱旁有隙可通入石室又承下洞水氣蒸潤常有烟霧旋擁左有石道曲折凡數百級至上洞入開豁平曠有淺水可涉秉炬而入石乳玲瓏有五色石橫互其上數步有石高十餘丈色亦五彩又有石牀石室千態萬狀深入愈奇宋李邦彥各其洞下曰噴雷中曰駐雲上曰飛霞且自爲之記乾道間張孝祥大書曰上清山洞范成大

亦有詩刻洞前有明眞寺藏塔院李邦彥又書玉谿橋三字

鳴玉洞 在縣西南十里餘去渠岸不遠洞門雖狹內極廣大深邃石乳下懸又有石牀石笋石盤諸狀泉聲琤琮舊名梵音羅震易今名

金鷄洞 在縣西南四里官道之側周圍有山延袤前江

九星山 按通志在興安縣東南有峯聳秀名曰狀元峯按明一統志在縣東二十里其峯聳秀特立宋侍郎唐則家於其旁鄉人以則父子相繼登科因名

黃華山 府志無按通志在興安縣東五里其

中有泉

融江 發源融山二洞流至本縣與靈川界首合而南流

鳳源水 在縣南地名南鳳源合於南渠爲灘

江

零水 在縣西南五十里源出鬱金山下南流

合灘水

桃花源 亦名瀉源水竝出南鄉合於海陽江

中江 湘灘二水之中即海陽之舊江鐔背雖分其派餘波流而成江至學前北折合於湘水

餌潭 又名餌江在縣東十五里按明一統志

石壁上下有犀牛蹟又有二石穴遇旱鄉民具舟作樂驅水牛百數下潭攪之投虎頭骨及朱書石符雨澤立應

漢潭 在鐔背之上蓋海陽與衆流匯而爲潭

灘湘之分始此

雙女井 在縣南七里泉源不竭流出南渠合灘江

靈渠 按明一統志在興安縣北其源即灘水昔秦始皇南戍五嶺命史祿鑿渠以通舟楫漢馬援南征餉道亦出於此唐觀察使李渤立斗門以通漕刺史魚孟威又以石爲堤乃通巨舟宋提刑李師中亦嘗脩浚明洪武末渠道湮壞遣御史嚴震直重修

廖家井 府志無按明一統志在興安縣其水清濁中分抱朴子云廖扶家丹井一族數百口飲之多壽有至百歲者

靈川縣

西峯山 在縣西北三里高數百丈四方峭拔其中坦夷上有雷廟龍泉

呂仙山 在縣西十里上有元眞觀宋靖康間洞賓曾遊此其山產茶

高鎮山 在縣西南二里有諸葛祠古名大象嶺

掛榜山 在縣西北五里高百餘丈

百丈山 在縣北十里重巒疊嶂綿亙數十里風起則飛鳥回旋不能度邑人張網捕之俗云鳥不過靈川是也按明一統志又名把仗山

半雲山 在縣西南其山發基平地四面孤高

金瓶山 在縣西十五里西峯連環率律狀類

金瓶

馬鞍山 在縣東二十五里與香爐山並矗

香爐山 在縣東北三十里高千仞中分一小山形若香爐

鳳凰山 在縣北八十里按九域志唐初有鳳來巢按明一統志聳秀可觀又古田縣北三十里亦有鳳凰山

千秋峯 在縣東北七里獨立聳翠又名文筆峯下有峽通大江名千秋峽峽口有巡檢司

靈巖 在縣西北三十里南北相通山高數百丈小溪環繞按明一統志下有巖南北相通若

堂殿水灌其中色如藍山谷百源輻湊其下可通舟楫宋王安中詩鑿破巖崖透碧流小舟輕泛入深幽石鱗映水玻璃皺山勢凌空翡翠浮

雲護淵泉時欲雨寒生洞府夏成秋停橈峭壁題名姓醉墨淋漓記此遊

眞仙巖 在縣西南三里其內穹窿可容數十人石乳凝結如珠纓寶蓋

讀書巖 在縣西三十餘里宋秦方兄弟讀書處

龍田巖 在縣西三里中有石田高低委曲宛若田疇

赤壁巖 接高鎮山

潦布嶺 在縣東三十里

雙蓋山 府志無按通志在靈川縣西北十里俗名涼傘山

舜山 府志無按通志在靈川縣西二十里峰岫如冠笏又名月華山

有深潭在側

銀江 在縣東北千秋峰側有峽通灘水甚險解縉詩百丈山頭雨乍晴靈川江上水初生薰風隔歲如相約兩度吹船上玉京 按明一統志東流入於灘江

海陽江 在縣東北一里山下有巖幽深行數步至泉水處闊不盈尺深不可測流至興安縣分爲湘灘二江

淦江 在縣東十五里水出興安縣界東江合

灘江

路江 在縣西北七里發源自猗峒東流至縣北分爲南陂邊城至北門外合灘江

白石湫 在縣南三十五里又名白石潭有慈應祠及白石巡檢司在焉唐李義山詩有所謂

龍移白石湫即此也

甘棠溪 在縣東西過白石湫合灘江

龍隱泉 在縣北上一巖斷爲龍首引注諸池舊名滑石泉宋鄒浩詩馬頭今日度嚴關十

九年前去復還惟有流泉聲似舊凭闌重聽響潺湲

龍泉 在縣西三里西峰之頂

陽朔縣

都利山 在陽朔縣北高十丈

陽朔山 在縣北隋時因以名縣宋咸詩獨起獨高雄入漢相輝相映翠成堆若非羣玉崑山至即是三峯海上來疑有洞天通日月絕無樵路到塵埃如何得似巨靈手擘向天家對鳳臺

陶弼詩石壁深深繞縣衙不離牀柱見烟霞民耕紫芋爲朝食僧煮黃精代晚茶瀑布聲中窺案牘女蘿蔭裏勸桑麻欲知言偃絃歌處水墨屏風數百家

龍頭山 在縣東北向高千餘尺下有唐侍郎曹鄴讀書堂今爲慈光寺

鑑山 在縣南三百步

白鶴山 在縣東南按明一統志相傳嘗有白鶴翔集頂上因名舊有白鶴觀

西人山 在縣西七里按明一統志有石如人東向而坐縣東南二十里又有東人山其形如人拱揖西向

東人山 在縣東南二十里明萬壽詩數里西山路千家夕照村霞光迴樹杪山影到雲根吏少空庭舍人歸附郭門地偏民俗好鷄犬任晨昏

天馬山 在縣西十五里形如馬

威南山 在縣西十五里下有晉征南將軍薛翊墓

浮坳山 在縣東南十五里視衆山尤爲高絕古羅山 在縣南三十里又名都羅山高數千尺頂有池下有西南夷酋莫氏塚

石銀山 在縣北四十里左右層巒疊嶂峭拔不可名狀惟此山色光如銀

寶山 在縣北五十里有瀑布飛流下注桂江
蕭山 在縣北五十里桂江之上其山九頭屹立丹崖蒼壁望之如繪畫然

雲源山 在縣西北七十里迤邐數百里陽朔羣山發軔於此

寶子山 在縣東北七十里接道州興平零陵二水出焉按通志作抱子山

塘山 在縣西十六里許

金泉山 在縣西二十五里山腹泉湧不涸

卓筆峰 在縣東三里一峰尖秀高聳如卓筆然

膏澤峰 在縣西一里天將雨則雲陶弼詩石壁含天澤南山第一重旱時先出雨陰穴必藏

龍雲影搖諸壑雷聲起半空何當大滂沛盡活四方農按明一統志天將雨雲氣油然歲旱以爲候

秀峰 在縣南其峰翠聳羣峰羅列若子孫列侍然按明一統志名雲翁峰

碧蓮峰 在縣西十五里其峰重疊叢立如蓮舊縣治在焉唐沈彬詩陶潛彭澤五株柳潘岳

河陽一縣花兩處不如陽朔好碧蓮峰下住人家按通志又名連碧峰

連碧峰 在縣西十五里有二十餘峰連接不斷望之一碧

讀書巖 在縣西十五里寨山之東曹鄴讀書於此

廣福巖 在縣南二十里又名羅漢洞可坐數百人中有複閣堂殿兩旁石窪疊如層龕肖羅漢像前有溪流橋中有乳石形如獅狀爲陽朔巖洞之冠宋邑令周大夫所闢

東明巖 在縣東十里有棧道通平樂獨秀巖 在縣南十里有南北二巖翠屏巖 在縣西四十里巖高而明石門三五俯仰若畫圖然

甘巖 在縣北七十里屹立灘江之旁如破甕側立中可棹小艇

龍隱巖 在縣西四十里石色如玉旁有二石盤其水泓然

粉巖 在縣西北六十里深十餘丈乳石如粉

東嶺 在縣東五十里又名提頭嶺爲昭賀全永靜江五州要衝之地按通志作昭賢賀全何佐詩我愛陽川好朝霞綢嶺東九光期遠嶂五色麗晴空初擬祥雲井還疑絳錦同海風吹不斷常伴日輪紅

珠明洞 在縣西一里

豹隱洞 在縣西一里有三石洞世傳爲夏相公宅基舊名棋盤洞

龍鱗洞 在縣西十五里中有小江江上乳石璨如龍鱗又名白龍洞按通志又名金鷄洞

乳洞 在縣西十五里中多乳石

十六洞 府志無按通志南北縱廣三十里

桂水 在縣治前自桂林沿平樂下蒼梧合流於海

東暉水 在縣西北五里發源於東暉村達於桂江
興平水 在縣北三十里發源寶子山南流者與灘江合北流者爲零陵水出道州

歸義水 在縣南二里

雙月溪 在縣南二十餘步有橋

觀源溪 在縣西十五里出乳洞下

馬蹄溪

烏龜潭 在縣西北五十里或有龜羣豐年之

兆

犀潭 在縣西三十里水合處有石穴云犀所

藏岸傍細草如苔人曰犀草

靈陂 神陂 清淥陂

六井 在縣十五里石生成六竅

翠屏石井 在崇教寺後

石渠 在城外十步許高數仞下有洞水深百

尺

東石渠 在獅子山下兩崖天成深丈餘有兩

石甕汪水泓深

官塘 在縣西十三里

瑞蓮塘 在縣西三十里

濁水塘 在縣西十三里

清白塘 在縣西四十里

異魚塘 在縣西十五里有魚綠鱗而紅嘴紅

鬣

清淥塘 在縣西十五里廣三十餘畝溉田十

餘頃

清泉 在縣西五十步湧出石渠之涯

金泉 在縣西十一里

飛泉 在縣西五十里自山腰飛注如銀河

趙源泉 在縣北十二里

龍母池 在縣南十步

龍潭 府志無按通志在縣東一日三潮則發

科者多或云有竅通海

永寧州

虎踞山 在永寧州北五里

會仙山 去州三里

鳳凰山 在州南三十里

天柱山 在州西南八里按明一統志在故古

田縣西南一百里

馬鞍山 在州南六里

翠眉峯 在州北三里

穿巖山 府志無按通志在州城南係楊文廣

妹征柳救兄開有碑

禾倉山 府志無按通志在州西有雲生雨即

至

銀屏山 府志無按通志在州東

寶蓋山 府志無按通志在州北

偃月山 府志無按通志在州南半里形如半

月

道姑巖 府志無按通志在州南四十里有寺

基尚存

銅掌巖 府志無按通志在州南六十里居民

禱雨之處

石盆巖 府志無按通志在州南七十里中多

石盆

將軍巖 府志無按通志在州西五里

百壽巖 府志無按通志在州東又名夫子巖

金釵巖 府志無按通志在州西三里其形似

釵

黃源水 在州西流經臨桂永福入灘江

有江 在州東合四源水併爲一江流入永福

江

大長江 府志無按通志在州北五十里源出

都狼山至永福入於灘

大巖江 府志無按通志有巖出泉會大江

東江 府志無按通志在州東流入永福

廻龍江 府志無按通志在新興里至州城下

白馬江 府志無按通志在州西一里出白馬

村山下

永福縣

鳳巢山 在縣北舊名華蓋山隋大業間雙鳳

來巢百鳥集山下宋建隆初復來巢聞於朝鑿

巢下得美玉以進後王世則大魁天下宋王子

宣詩古邑荒涼瞰小溪青山高與白雲齊鳳凰

飛去巢阿閣未肯重來覓故棲又詩鳳凰飛去

聽簫韶燕雀羣飛想見嘲記取舊時棲止處莫

教鷹隼誤來巢

永福山 在縣南五里隋大業中建縣門對此

山因名

登雲山 在縣西五里常有雲

獨秀山 在縣東三十里高百餘尺

金山 在縣西南十里

靈壽山 在縣東五十里

欄蠻山 在縣西南按明一統志宋陶弼詩西